

ZENIČKO-DOBOJSKI KANTON
SKUPŠTINA
Nezavisni odbor

Na osnovu člana 24. i 34. stav (2) i (3) Zakona o unutrašnjim poslovima Zeničko-dobojskog kantona («Službene novine Zeničko-dobojskog kantona», broj: 13/18, 6/19, 22/19, 21/20, 10/21 i 8/23), a u vezi sa članom 8. Zakona o ministarskim, vladinim i drugim imenovanjima FBiH («Službene novine Federacije BiH», broj: 34/03 i 65/13) i člana 60. Zakona o policijskim službenicima Zeničko-dobojskog kantona– Prečišćeni tekst («Službene novine Zeničko-dobojskog kantona», broj: 4/14 i 2/18), Nezavisni odbor, na 3. sjednici, održanoj dana 14.07.2023. godine, r a s p i s u j e:

JAVNI KONKURS
za imenovanje policijskog komesara
Ministarstva unutrašnjih poslova Zeničko-
dobojskog kantona

I

OVLAŠTENJA POLICIJSKOG KOMESARA

Policijski komesar rukovodi Upravom policije i ovlašten je da:

- a) predstavlja Upravu policije, organizira i osigurava obavljanje svih poslova iz nadležnosti Uprave policije;
- b) nadgleda i usmjerava aktivnosti Uprave policije kojom rukovodi prema godišnjem planu rada Uprave policije i obavezama u rukovođenju iz ovog člana;
- c) odlučuje u upravnim stvarima iz nadležnosti Uprave policije;
- d) donosi propise i predlaže ministru donošenje propisa iz nadležnosti Uprave policije za koje je ovlašten zakonom;
- e) odlučuje o zasnivanju i prestanku radnog odnosa, kao i o pravima i obavezama iz radnog odnosa policijskih službenika;
- f) odlučuje o pravima, obavezama i odgovornostima iz radnog odnosa državnih službenika i namještenika u Upravi policije;
- g) odlučuje o disciplinskoj odgovornosti policijskih službenika za lakše povrede službene dužnosti na način propisan zakonom;
- h) priprema prijedloge potrebnih finansijskih i drugih sredstava za rad Uprave policije;
- i) odlučuje o korištenju sredstava i vrši nabavku opreme i materijalno-tehničkih sredstava u skladu sa namjenom odobrenih sredstava na budžetskoj poziciji Uprave policije;

- j) priprema tromjesečne izvještaje i preporuke u vezi sa realizacijom budžeta koje podnosi ministru;
- k) imenuje stručne komisije i odgovarajuća radna tijela u vezi sa poslovima iz nadležnosti Uprave policije;
- l) utvrđuje potrebe, određuje i osigurava provođenje programa stručnog osposobljavanja i usavršavanja zaposlenika Uprave policije;
- m) organizuje jedinstven sistem izvještavanja i obrade podataka neophodnih za vršenje poslova Uprave policije;
- n) ostvaruje saradnju sa drugim policijskim organima i agencijama za sprovođenje zakona u Bosni i Hercegovini, te sarađuje sa tužilaštvima, sudovima i drugim nadležnim pravosudnim organima o pitanjima iz nadležnosti Uprave policije;
- o) priprema programe, informacije, analize i druge materijale iz djelokruga rada Uprave policije na zahtjev ministra, Vlade Kantona ili Skupštine Kantona;
- p) redovno izvještava ministra o poduzetim aktivnostima Uprave policije, a odmah o događajima i rezultatima poduzetih aktivnosti koje imaju značaj za sigurnost građana i interese Kantona, na osnovu sporazuma između ministra i policijskog komesara;
- r) sačinjava godišnji izvještaj o svom radu i isti dostavlja ministru;
- s) obavještava javnost o radu Uprave policije, na osnovu podzakonskog akta iz člana 20. stav (2) tačka h) ovog zakona;
- t) dostavlja informacije i statističke podatke Federalnoj upravi policije u vezi sa poslovima iz nadležnosti Federalne uprave policije koji su povjereni Upravi policije;
- u) organizuje i nadzire osiguranje određenih ličnosti i objekata;
- v) mjesečno izvještava Nezavisni odbor o rezultatima svog rada;
- z) odobrava upotrebu Specijalne policijske jedinice i Jedinice za sprečavanje narušavanja javnog reda i mira u većem obimu;
- aa) donosi instrukcije, uputstva i planove radi izvršavanja policijskih poslova;
- ab) vrši druge poslove koji su propisani ovim i drugim zakonom.

Policijski komesar je samostalan u operativnom planiranju i provođenju policijskih aktivnosti.

Policijski komesar za svoj rad odgovoran je ministru i Vladi Kantona.

Policijski komesar može ovlastiti načelnika Sektora uniformisane policije i načelnika Sektora kriminalističke policije da vrše određene poslove iz člana 22. stav (1) Zakona o unutrašnjim poslovima Zeničko-dobojskog kantona.

II

MANDAT POLICIJSKOG KOMESARA

Mandat Policijskog komesara je četiri godine, a može se obnoviti samo jednom uzastopno.

III

USLOVI ZA IMENOVANJE POLICIJSKOG KOMESARA

Kandidat za policijskog komesara mora ispunjavati sljedeće uslove:

- a) da je državljanin Bosne i Hercegovine;
- b) da je zdravstveno sposoban za vršenje poslova;
- c) da ima najmanje VII stepen školske spremne ili najmanje završen prvi ciklus visokog obrazovanja bolonjskog sistema studiranja sa 240 ECTS bodova;
- d) da ima čin glavnog inspektora i najmanje tri godine radnog iskustva u tom činu;
- e) da nije pravosnažno osuđivan za krivično djelo;
- f) da se protiv njega ne vodi krivični postupak u skladu sa zakonima o krivičnom postupku u Bosni i Hercegovini;
- g) da nije disciplinski kažnjavao za teže povrede službene dužnosti;
- h) da se na njega ne odnosi odredba člana IX stav 1. Ustava Bosne i Hercegovine;
- i) da nije bio član političke stranke nakon stupanja na snagu Zakona o policijskim službenicima Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 4/14 i 2/18), ili odgovarajućeg zakona koji propisuje prava i obaveze policijskih službenika u policijskom organu gdje je zaposlen u vrijeme prijavljivanja na konkurs;
- j) da nije bio na bilo kojoj poziciji u političkoj stranci na bilo kojem nivou i da nije bio postavljen na bilo koju poziciju od strane političke stranke nakon stupanja na snagu Zakona o policijskim službenicima ili odgovarajućeg zakona koji propisuje prava i obaveze policijskih

službenika u policijskom organu gdje je zaposlen, u vrijeme prijavljivanja na konkurs;

- k) da nije bio član izvršnog ili zakonodavnog tijela na bilo kojem nivou vlasti u Bosni i Hercegovini, nakon stupanja na snagu Zakona o policijskim službenicima ili odgovarajućeg zakona koji propisuje prava i obaveze policijskih službenika u policijskom organu gdje je zaposlen u vrijeme prijavljivanja na konkurs.

IV

POTREBNA DOKUMENTACIJA

Uz prijavu na javni konkurs, kandidati su dužni dostaviti dokumentaciju (**originalne ili ovjerene kopije**), kojom dokazuju ispunjavanje propisanih uslova **i to**:

1. Uvjerjenje o državljanstvu Bosne i Hercegovine
2. Dokaz o zdravstvenoj sposobnosti za vršenje poslova policijskog komesara, (ljekarsko uvjerenje nadležne zdravstvene ustanove),
3. Diplomu nadležne visokoškolske ustanove o stečenoj stručnoj spremi,
4. Uvjerjenje/potvrdu o posjedovanju čina glavnog inspektora i o radnom iskustvu u tom činu,
5. Uvjerjenje/potvrdu nadležnog organa da kandidat nije pravosnažno osuđivan za krivično djelo,
6. Uvjerjenje/potvrdu nadležnog organa da se protiv njega ne vodi krivični postupak u skladu sa zakonima o krivičnom postupku u Bosni i Hercegovini;
7. Izjavu ovjerenu od nadležnog organa o ispunjavanju uvjeta iz tačke III g, h), i), j) i k)

V

KRITERIJI ODABIRA

Pored razgovora, u procesu odabira kandidata Nezavisni odbor uzima u obzir sljedeće kvalifikacije:

- a) stručno usavršavanje;
- b) godine policijskog iskustva na rukovodećim radnim mjestima;
- c) ocjenu rada u posljednje tri godine i
- d) ostale kvalifikacije koje odgovaraju potrebama radnog mjesta.

Pored dokumentacije iz tačke IV ovog javnog konkursa, kandidat koji se poziva na razgovor dostavlja i svoj prijedlog plana i programa rada za vrijeme trajanja mandata, kao i

dokumentaciju kojom dokazuje gore navedene kvalifikacije propisane članom 35. stav (2) Zakona o unutrašnjim poslovima Zeničko-dobojskog kantona.

Nezavisni odbor sačinjava rang listu kandidata na osnovu rezultata razgovora, ocjene kvalifikacija i predloženog plana rada iz člana 35. stav (1) i (2) Zakona o unutrašnjim poslovima Zeničko-dobojskog kantona.

VI

OBJAVLJIVANJE JAVNOG KONKURSA I DOSTAVLJANJE PRIJAVA KANDIDATA

Javni konkurs će biti objavljen u «Službenim novinama Federacije BiH» i u dva dnevna lista koji se distribuiraju na cijeloj teritoriji Bosne i Hercegovine, („Dnevni avaz“, i „Oslobođenje“), kao i na web stranici Zeničko-dobojskog kantona www.zdk.ba.

Prijave sa potrebnom dokumentacijom se dostavljaju u roku od 15 dana od dana zadnjeg objavljivanja konkursa na zajedničku pisarnicu (protokol) Zeničko-dobojskog kantona ili putem pošte preporučeno, na adresu:

Skupština Zeničko-dobojskog kantona – Nezavisni odbor, Ul. Kučukovići br. 2. 72000 Zenica, sa naznakom:

«Javni konkurs za imenovanje policijskog komesara MUP-a Zeničko-dobojskog kantona» - NE OTVARAJ.

Nepotpune i neblagovremene prijave neće se uzimati u razmatranje.

PREDSJEDAVAJUĆI
Semir Šut, s.r.